



Kommunane i Vestland

Saksbehandlar, innvalstelefon

Håvard Rød, 5557 2143

Statsbudsjettet for 2025 - kommuneopplegget

Regjeringa presenterer framlegg til statsbudsjett for 2025. Statsforvaltaren vil her gi eit samandrag av kommuneopplegget.

Det er ein pårekna vekst frå 2024 til 2025 i frie inntekter for kommunane samla i Vestland på 5,7 prosent. Pårekna vekst for kommunane samla i landet er 5,8 prosent. 23 kommunar i Vestland ligg over landsgjennomsnittet, medan 20 kommunar ligg under.

I brevet betyr «kommunane» primærkommunane utan at fylkeskommunane er med, og «departementet» betyr Kommunal- og distriktsdepartementet (KDD).

Vi tek i innleiinga med endringar i kommuneøkonomien for i år.

Det økonomiske opplegget for 2024

Dei pårekna skatteinntektene for kommunane i år er no reduserte frå kr 220 400 mill. i revidert nasjonalbudsjett til kr 218 400 mill., det vil seie kr 2,0 mrd. lågare enn i revidert nasjonalbudsjett. Pårekna skattevekst frå innkomen skatt i 2023 til i år blir med dette justert ned frå 4,7 prosent i revidert nasjonalbudsjett til 3 ³/₄ prosent no. Dette er skatt på formue og inntekt, medrekna naturressursskatt.

Kostnadsdeflatoren for kommunane var i revidert nasjonalbudsjett 4,3 prosent. Pårekna lønsvekst var 5,2 prosent og pårekna prisvekst varer og tenester var 3,0 prosent i revidert nasjonalbudsjett.

Den pårekna kostnadsveksten for i år er no justert frå 4,3 prosent til 4,4 prosent. Denne består av:

lønsvekst	5,2	prosent	(vekt 0,574)
prisvekst kjøp av varer og tenester	3,4	prosent	(vekt 0,426)
Samla prisvekst	4,4	prosent	

Det blir på denne bakgrunn no rekna med både lågare skatteinntekter og noko større kostnadsvekst i år enn pårekna i revidert nasjonalbudsjett.



Det er dessutan rekna med auka pensjonskostnader.

Regjeringa sitt framlegg for budsjettåret 2025

Det er rekna med ein skatteauke for kommunane frå 2024 til 2025 med 7,5 prosent, til samla skatteoverslag kr 234,8 mrd. i 2025. Høg pårekna skattevekst frå 2024 til 2025 har bl.a. samanheng med at skatteprognosen i år er blitt svakare.

Det er i statsbudsjettet lagt opp til at det kommunale skatteøyret blir auka frå 10,95 prosent i 2024 til 12,75 prosent i 2025. Bakgrunn for fastsetjing av skatteøyret er at skattedelen av kommunane sine samla inntekter framleis skal vere om lag 40 prosent også for 2025. Skatteøyret blir auka i 2025 for å gi kommunane høgare inntektsskatt som kompensasjon for lågare formuesskatt og bortfall utbytte-skatt.

Den samla pris- og kostnadsveksten i kommunane - kommunal deflator - er i framlegget 4,1 prosent. Deflatoren blir nytta til prisjustering av statlege rammetilskot og øyremerkte tilskot i statsbudsjettet. Kostnadsdeflatoren består av:

lønsvekst	4,5	prosent	(vekt 0,574)
prisvekst kjøp av varer og tenester	3,5	prosent	(vekt 0,426)
Samla prisvekst	4,1	prosent	

Samla vekst i frie inntekter

Det er lagt opp til ein realvekst i dei frie inntektene for primærkommunane frå 2024 til 2025 på kr 5,15 mrd. Denne veksten er rekna frå inntektsnivået i år som var lagt til grunn i revidert nasjonalbudsjett.

Veksten i dei frie inntektene er realauke slik at priskompensasjonen frå 2024 til 2025 vil kome som eit tillegg i inntektene.

Veksten i frie inntekter må blant anna dekke auka kostnader som følgje av befolkningsutviklinga. Pårekna meirkostnader demografi i 2025 er rekna til om lag kr 2,5 mrd. for primærkommunane. Dette er den delen av meirkostnadene som må bli dekte av veksten i dei frie inntektene.

Det er pårekna ein reduksjon i pensjonskostnader (utover pårekna lønsvekst) i 2025 for kommuneforvaltninga samla med kr 0,5 mrd. Primærkommunane sin del av denne reduksjonen kan reknast til om lag kr 0,45 mrd. (90 prosent). I overslaget for pensjonskostnader er det ikkje teke omsyn til verknad av ny offentlig AFP frå 1. januar 2025. Regjeringa vil kome attende til verknader av dette og kompensasjon i revidert nasjonalbudsjett for 2025.

Kr 250 mill. av veksten i dei frie inntektene i 2025 er grunngitt med auka bemanning i barnehagar.

Innafor veksten i dei frie inntektene for kommunane i 2025 skal det også vere rom for ei satsing med kr 150 mill. til arbeid med psykisk helse og rus. Dette er ei vidareføring av opptrappingsplan.

Kr 1,5 mrd. av veksten i dei frie inntektene frå 2024 til 2025 blir gitt med ei særskilt fordeling etter inntektsnivå. Denne fordelinga inngår i den samla realveksten i dei frie inntektene på kr 5,15 mrd. frå 2024 til 2025. Fordelinga av vekst kr 1,5 mrd. i 2025 blir gitt slik at kommunar med låge inntekter i 2023 får ein større del av inntektsveksten per innbyggjar. Fordelinga er vist i vedlegg.



I inntektsnivå, som grunnlag for fordelinga, inngår netto konsesjonskraftinntekter, eige-domsskatt frå kraft- og petroleumsanlegg, havbruksinntekter og produksjonsavgift på vindkraft, i tillegg til personskatt og naturressursskatt. Fordelinga mellom kommunane vil etter 2025 bli oppdatert årleg på grunnlag av nye inntektstal.

Det er også lagt opp til ein tapskompensasjon, kr 151,5 mill., særskilt fordelt til kommunar som taper på dei samla endringane i inntektssystemet (etter nye oppdaterte verknader). Det blir teke omsyn til fordelinga av kr 1,5 mrd., fordelt etter inntektsnivå. Ordninga omfattar kommunar som har inntekter frå skatt og naturressursar under 105 prosent av landsgjennomsnittet. Fordelinga inngår som del av realveksten i frie inntekter på kr 5,15 mrd. frå 2024 til 2025. Fordelinga er vist i vedlegg. Den vil bli vidareført på same årlege nivå etter 2025, til neste revisjon av inntektssystemet.

Realvekst i dei frie inntektene frå 2024 til 2025, kr 5,15 mrd., blir delt mellom personskatt og rammetilskot. Den delen av veksten som kjem på rammetilskotet vil for ein stor del kome som særskilt fordeling i samband med nytt inntektssystem (kr 1,5 mrd. + kr 151,5 mill.), jf. avsnitta over.

Frie inntekter – skatt og rammeoverføring – for kvar kommune

Vedlagt tabell syner rammeoverføring og pårekna frie inntekter for 2025. Pårekna skatt og inntektsutjamning i tabellen byggjer på kommunane sin faktiske skatteinngang i 2023. Dette grunnlaget er justert opp med pårekna skattevekst i prosent for 2024 og 2025.

Det er teke omsyn til auken i kompensasjons-/trekkgrad i inntektsutjamninga frå 60 prosent i 2024 til 62 prosent i 2025. I overslaga for frie inntekter i 2025 er det teke omsyn til reduksjon i kommunal formuesskatt (nedtrapping med ¼ i 2025) og bortfall utbytteskatt.

Veksten i frie inntekter vil variere mellom kommunane. Årsaker er følgjande punkt som påverkar kommunane ulikt :

- verknader av omlegging inntektssystemet frå 2024 til 2025
- endringar i folketalet og alderssamansetjing
- endring i andre kriteriedata
- endring i fordelinga av skjønstilskot
- endring i veksttilskot
- endring i distriktstilskot eller småkommunetillegg, jf. endringar i samband med omlegging inntektssystemet frå 2024 til 2025
- endringar i skattegrunnlaget
- opptrapping av kompensasjon i 2025 som følgje av reduksjon i eige-domsskatt frå 2019 etter endring i skattereglar for produksjonsutstyr og installasjonar (reduksjon i eige-domsskatt inngår ikkje i utrekninga av prosentvekst frie inntekter).

Priskompensasjon frå 2024 til 2025 er innarbeidd i oversynet over dei frie inntektene i vedlagt tabell.

Vekst i dei frie inntektene frå 2024 til 2025 er rekna frå pårekna inntektsnivå i år no. Det er rekna med ein nominell vekst i kommunane i landet sine samla frie inntekter frå 2024 til 2025 på 5,8 prosent. Den pårekna veksten for kommunane samla i Vestland er 5,7 prosent. Nominell vekst i frie inntekter må sjåast i samanheng med at pårekna prisvekst for kommunesektoren er 4,1 prosent for 2025.

Auka rammeoverføring blir gitt for nye oppgåver og omfattar også heilårsverknader i denne samanhengen. Utrekna prosentvekst i dei frie inntektene er korrigererte for dette i vedlagt tabell, slik at det ikkje inngår i prosentveksten. I utrekning av prosentvekst er det også korrigert for innlemming av øyremerkte tilskot i rammetilskotet.



Særskilte saker

Tilskot per grunnskule

Frå 2022 er det gitt eit tilskot per kommunal grunnskule. Tilskotet er gitt med ei særskilt fordeling i rammetilskotet, basert på talet for grunnskular og finansiert med eit likt beløp per innbyggjar innafor innbyggjartilskotet til kommunane.

Tilskotet er vidareført i framlegget for 2025, om lag kr 1,36 mrd. samla for kommunane i landet. Tilskotet inngår i beløpa for sum rammetilskot i vedlagt tabell. Tilskotssats blir prisjustert (4,1 prosent) til kr 563 511,- per grunnskule i 2025.

Investeringar og kjøp av utstyr i skulen

Det vart frå 2024 innført ei ny rentekompensasjonsordning til kommunar for investeringar som kan bidra til meir praktisk og variert opplæring i skulen. Det er lagt opp til ei samla investeringsramme som grunnlag for rentekompensasjon på kr 8 mrd., fordelt med kr 1 mrd. i året i 8 år.

Det er framlegg om å auke tilskot til utstyr og arenaer for meir praktisk og variert læring i skulen, frå kr 127 mill. til kr 160 mill. i 2025.

Helsestasjon og skulehelseteneste

Den delen av rammetilskotet som er grunnlagt med satsinga på helsestasjon og skulehelsetenesta blir vidareført frå 2024 til 2025, med priskompensasjonen på 4,1 prosent. Samla ramme for landet er kr 1114 mill. Midlane blir fordelte mellom kommunane på grunnlag av talet på innbyggjarar i alderen 0–19 år, med eit minstenivå på kr 100 000,- per kommune.

Ressurskrevjande tenester

Ordninga med øyremerkte tilskot for ressurskrevjande tenester gjeld for tenestemottakarar til og med det året dei blir 67 år. Utbetaling av tilskot til kommunane i 2025 blir på grunnlag av direkte lønsutgifter i 2024 til tenestene:

Innslagspunktet for å få kompensasjon utbetalt i 2025, på grunnlag av netto utgifter i 2024, blir auka per tenestemottakar frå kr 1 608 000,- til kr 1 692 000,-. Auken i innslagspunktet er lik påreknede lønsvekst i prosent i 2024 (5,2 prosent).

Tilskot for personar med psykisk utviklingshemming (16 år og eldre) i inntektssystemet for 2024 blir trekt frå nettoutgiftene i berekningsgrunnlaget. Verdien av PU-kriteriet på om lag kr 890 000,- i inntektssystemet for 2024, blir trekt frå nettoutgiftene per person i grunnlag for refusjonskrava i 2025. Eventuelle statlege øyremerkte tilskot blir også trekte frå i dette grunnlaget.

Kompensasjonen som blir utbetalt frå staten til kommunane i 2025, skal kommunane inntektsføre i sine rekneskap for 2024. Kommunane skal inntektsføre den påreknede kompensasjonen i rekneskapen for det same året som utgiftene har vore.

I tilskotsordninga har kommunane sin eigendel vore 20 prosent av netto utgiftene over innslagspunktet per tenestemottakar. Kompensasjonsgraden har vore 80 prosent av netto utgifter over innslagspunktet. Det vart i kommuneproposisjonen for 2025 lagt opp til ein ny berekningsmodell for ressurskrevjande tenester, som no inngår i statsbudsjettet.

Den nye modellen vil ha to eigendelar:



1. Det blir først berekna ein eigendel over innslagspunktet som er lik per innbyggjar for alle kommunane i landet. Eigendel per innbyggjar blir multiplisert med innbyggjartalet i kommunen for å finne summen for den første eigendelen i kommunen.
2. Den andre eigendelen vil vere 10 prosent av netto utgiftene over innslagspunktet etter at den første eigendelen er trekt frå.

I denne modellen vil det vere to eigendelar som til saman blir eigendel over innslagspunktet. Eigendelane vil framleis utgjere 20 prosent av utgiftene på landsbasis, men vil i den nye modellen variere mellom kommunane.

Ny modell skal i større grad kompensere kommunar med høge utgifter til tenestene per innbyggjar.

Den nye berekningsmodellen skal nyttast for utbetaling av tilskot til kommunane allereie i 2025. Då kommunane skal inntektsføre dette tilskotet i 2024, må det bli gjort korreksjon for det kommunane allereie har budsjettert for 2024.

Verdien av PU-kriteriet får lågare vekt i inntektssystemet for 2025. Dette inneber at trekk i grunnlaget for utbetaling av kompensasjon i 2026 blir lågare, noko som isolert bidreg til eit høgare berekningsgrunnlag. For å nøytralisere denne verknaden, er det lagt opp til å auke innslagspunktet for kompensasjon i ordninga med om lag kr 165 000,- per mottakar. Regjeringa vil kome attende til nærare fastsetjing av denne auken i innslagspunkt i statsbudsjettet for 2026. Auken i innslagspunkt kan bli noko større enn kr 165 000,- for utbetaling av tilskot i 2026.

Lågare vekt og verdi PU-kriteriet og auke i innslagspunkt vil først få verknad for utbetalinga av tilskot i 2026, men må takast omsyn til i inntektsføring i budsjettet for 2025.

Ressurskrevjande tenester - tilleggskompensasjon

Mindre kommunar som har særlege høge utgifter til ressurskrevjande tenester, får ein særskilt kompensasjon. Kompensasjonen kjem i tillegg til det ordinære toppfinansieringstilskotet for ressurskrevjande tenester. Det er følgjande kriterium for at kommunar skal få tilskotet:

- mindre enn 3200 innbyggjarar
- høge utgifter til ressurskrevjande tenester per innbyggjar (tal per 31.12.2024)
- gjennomsnittlege skatteinntekter dei siste tre åra som er lågare enn 120 prosent av landsgjennomsnittet (berre ordinær skatt blir lagt til grunn, ikkje eigedomsskatt/havbruksmidlar m.m.)

Kommunane blir i 2025 kompenserte med 80 prosent av netto utgiftene over ein terskelverdi per innbyggjar. Det er framlegg om å auke ramma for tilleggskompensasjon til kr 92,2 mill. i 2025, medrekna prisjustering.

Heildøgns omsorgsplassar - investeringstilskot

Regjeringa gjer framlegg om ei tilsegnsramme i 2025 for investeringstilskot som legg til rette for om lag 1500 heildøgns omsorgsplassar.

Barnevernsreforma

Barnevernsreforma trådde i kraft 1. januar 2022. Reforma gir kommunane auka fagleg og økonomisk ansvar for barnevernet. Det er overført kompensasjon gjennom auke i rammetilskotet for det auka ansvaret.

Alle midlane vil frå og med 2025 bli fordelte etter delkostnadsnøkkelen for barnevern. Det inneber at ikkje noko av midlane lenger vil bli fordelte særskilt på grunnlag av tidlegare bruk.



Kompensasjon for endringar i regelverket for eigedomsskatt

Kommunar som taper eigedomsskatt som følgje av regelendring (bortfall skatt frå 2019 på produksjonsutstyr og installasjonar) vil få kompensasjon også i 2025, som særskilt fordeling. Det blir siste året i overgangsperioden på sju år. Det er ikkje gitt signal om kompensasjon for åra etter 2025.

Inntektssystemet i 2025

I samband med kommuneproposisjonen for 2025 var det lagt opp til fleire endringar i inntektssystemet med verknad frå 2025, jf. vårt brev av 22. mai d.å. Endringane inngår no i statsbudsjettet for 2025. I samsvar med kommuneproposisjonen, er det også lagt opp til endring i skattegrunnlaget med halvering av kommunal formuesskatt gradvis over åra 2025 og 2026 (nedtrapping med ¼ i 2025) og bortfall utbytteskatt frå 2025.

Inntektsutjamning

Den symmetriske inntektsutjamninga i prosent (kompensasjon/trekk) blir auka over to år. Inntektsutjamninga blir auka frå 60 prosent i år til 62 prosent i 2025, og frå og med 2026 til 64 prosent. Tilleggskompensasjonen – for kommunar med lågt skattenivå – er vidareført med 35 prosent av det skattenivået i kommunen er under 90 prosent av landsgjennomsnittet.

Utgiftsutjamning

Gjennom utgiftsutjamninga i inntektssystemet skal kommunane få full kompensasjon for skilnader i kostnader som dei ikkje sjølv kan påverka. Grunnlaget for omfordelinga i utgiftsutjamninga er utgiftsbehovet per innbyggjar for landsgjennomsnittet og for den einskilde kommune.

Utgiftsutjamninga og kostnadsnøklane blir oppdaterte på grunnlag av faglege analysar og den faktiske utviklinga i kommunane sine utgifter.

Det er frå 2025 lagt opp til fleire endringar i kostnadsnøklane i utgiftsutjamninga, bl.a. får PU-kriteriet lågare vekt, sosiale tenester blir utvida og levekårskriteria får auka vekt.

Før 2017 var basistilskotet eit like stort tilskot til alle kommunar, uavhengig av kommunen sitt folketal og reiseavstand. Frå 2017 har det vore ei gradering av basistilskotet (halvdelt) etter reiseavstand. Ordninga med gradering av basistilskotet blir teken bort frå 2025, slik at basistilskotet på nytt blir eit like stort tilskot per kommune. Alle kommunar vil difor frå 2025 få fullt basistilskot. I 2025 blir dette kr 24,3 mill. per kommune.

Endringane i kostnadsnøklane og basistilskot blir omfatta av overgangsordninga INGAR.

Grunnlaget for berekning av utgiftsutjamninga for 2025 blir rekneskapstal for 2023, framskrive til 2025 med å legge til pårekna prosentvekst i frie inntekter.

Overgangsordninga INGAR

Overgangsordninga med inntektsgarantitilskot (INGAR) gir kompensasjon for ei utvikling i rammetilskotet med meir negativt avvik enn eit fastsett beløp per innbyggjar (grenseverdien) frå landsgjennomsnittet, frå eitt år til det neste. Grenseverdien for kompensasjon er no kr 400,- per innbyggjar. Det vil m.a.o. vere den delen av utviklinga i rammetilskot frå det eine året til det neste året som er meir enn kr 400,- per innbyggjar svakare enn landsgjennomsnittet, som blir kompensert.

INGAR tek ikkje omsyn til endring i skatt, inntektsutjamning, veksttilskot og skjønstilskot. Endringar i tilskot i særskilt fordeling blir i hovudsak heller ikkje teken omsyn til i overgangsordninga INGAR.



INGAR tek omsyn til endringar i inntektssystemet, innlemming av øyremerkte tilskot i ramme-overføring, oppgåveendringar, endringar i kriteriegrunnlaget, endring i småkommunetillegg og distriktstilskot.

Teljetidspunkt

For 2025 gjeld folketal per 1. juli 2024 for innbyggjartilskotet (medrekna overgangsordninga INGAR) og kriteria for aldersgrupper i utgiftsutjamninga. Andre kriteriedata i utgiftsutjamninga er frå 1. januar 2024. Oppdatering av folketal i inntektsutjamninga blir vidareført med teljedato 1. januar i sjølve budsjettåret (2025).

Veksttilskot

Veksttilskotet blir gitt til kommunar som har hatt ein gjennomsnittleg årleg befolkningsvekst dei siste tre åra høgare enn ei vekstgrense i prosent.

Veksttilskotet blir gitt med eit fastsett beløp per innbyggjar utover vekstgrensa. Denne tilskotssatsen er i 2024 kr 67 331,-. Tilskotssatsen blir redusert i 2025 til 1/3 av sats i 2024. Voss kommune er einaste kommune i Vestland som får veksttilskot i 2025 (kr 92 000,-).

Regionalpolitiske tilskot

Det er lagt opp til å ta i bruk den reviderte distriktsindeksen frå 2020 som grunnlag for distriktstilskot og småkommunetillegg frå og med 2025. Intervall for dei ulike satsane for distriktstilskot blir også endra.

Det er lagt opp til å utvide inntektsgrunnlaget, som skal reknast med i høve til inntektsgrensa, for å få distriktstilskot. Inntektene blir utvida frå personskatt og naturressursskatt til også eigedomsskatt på kraft- og petroleumsanlegg, netto konsesjonskraftinntekter, havbruksinntekter og produksjonsavgift på vindkraft. Det blir rekna eit gjennomsnitt for inntektene dei siste fire åra. Inntektsgrensa for å kunne få distriktstilskot blir auka til 140 prosent av landsgjennomsnittet.

Det er nye satsar for distriktstilskot (kommunar med over 3200 innbyggjarar). Tilskot blir gitt med ein sats per kommune og ein sats per innbyggjar. Jo høgare distriktsindeksen er, jo lågare blir tilskotet.

Berekningsgrunnlaget for å få småkommunetillegget er det same som for det ordinære distrikts-tilskotet, men omfattar kommunar under 3200 innbyggjarar. Høgare distriktsindeks gir mindre tilskot. Kommunar med indeks i det lågaste intervallet for indeks får fullt tilskot. Kommunar med høgast indeks (over 58) får halvt tilskot.

Regionsentertilskotet blir avvikla frå 2025. Tilskotet er gitt til kommunar som etter samanslåing frå 2020 fekk meir enn om lag 8 000 innbyggjarar.

Inndelingstilskot

Samanslåingskommunar får eit årleg inndelingstilskot. Tilskotet er gitt årleg frå og med år 2020 for ein periode på femten år og blir deretter trappa ned over fem år. Inndelingstilskotet blir tillagt priskompensasjon kvart år. Tilskotet erstattar bortfall av basistilskot og eventuelt bortfall av småkommunetilskot/reduksjon distriktstilskot som følge av samanslåinga.

Inndelingstilskotet er tillagt priskompensasjon frå 2024 til 2025 (4,1 prosent).



Særskilt tapskompensasjon

Regjeringa gjer framlegg om ein særskilt tapskompensasjon til kommunar som har ein pårekna negativ førsteårsverknad av nytt inntektssystem og endring i skattegrunnlag (reduksjon kommunal formuesskatt og bortfall utbytteskatt). Kompensasjonen er for dei kommunane som vil få eit tap første året i 2025 på over kr 3 000,- per innbyggjar. Heile tapet ut over dette nivået blir kompensert. Kompensasjonsordninga er avgrensa til 2025 og med andre ord eittårig.

Austevoll kommune er ein av tre kommunar i landet som blir omfatta av ordninga. Kompensasjon inngår i vedlagt tabell for sum rammetilskot. Kompensasjonsbeløpet er for Austevoll kommune i 2025 kr 5,9 mill.

Fordelingsverknader av nytt inntektssystem

I kommuneproposisjonen var det ein førebels illustrasjon for fordelingsverknader av nytt inntektssystem. Fordelingsverknadene er no oppdaterte, og blir brukte som grunnlag for tapskompensasjon. Grunnlaget er oppdatert med kriteriedata som blir brukt i inntektssystemet for 2025, nyare skattetal (2022 og 2023) og nyare grunnlagstal for berekning av tilskot ressurskrevjande tenester.

Det vil framleis vere uvisse til overslaga for fordelingsverknader då det vil vere den faktiske skatten i 2025 som er skattegrunnlaget for verknadene.

Skjønstilskot

Basisramma for skjønstilskot til kommunane for heile landet blir vidareført med same beløp i 2025 som i 2024, kr 800 mill. Vestland si ramme blir også vidareført med same beløp frå 2024 til 2025, kr 139,1 mill.

Ein del av skjønnsramma for 2025 vil først bli fordelt mellom kommunar i budsjettåret 2025. Vi har delt skjønsmidlane mellom ordinært skjøn no i statsbudsjettet (kr 110,7 mill.), fornyings- og innovasjonsprosjekt (kr 14,2 mill.) og til fordeling elles i budsjettåret (kr 14,2 mill.) som følgje av t.d. uventa hendingar.

Fordelinga av ordinært skjønstilskot for 2025 er vist i eigen kolonne i vedlagt tabell. Vi viser til nettsida vår der det blir lagt ut meir informasjon om fordelinga av skjønstilskot mellom kommunane.

Med helsing

Liv Signe Navarsete

Synnøve Stalheim
kommunaldirektør

Dersom det er spørsmål til innhaldet i brevet, kan kommunane ta kontakt med Håvard Rød (55572143), Marit Lunde (57643005), Edvard Høgestøl (55572045) eller Ingunn Broch Hauge (57643020) hjå Statsforvaltaren, eventuelt på e-post.

Vedlegg

